

Moziun Engler – gea u na?

Oz decida il cussegl naziunal

DA CLAUDIA CADRUVI / ANR

■ **Ina «cumissiun da convivenza» duai s'occupar da dumondas da linguas e cussegljar la regenza svizra. Quai pretendia Stefan Engler en ina moziun che la chombra pitschna ha gia approvà. Uss dependi da la chombra gronda sche l'idea vegn realisada. La cumissiun predeliberanta recumonda cun 13 cunter 11 vuschs ina refusa.** Ils trais cussegliers grischuns che l'anr ha dumandà èn tuts persuenter. *Duri Campell* s'exprima in pau sceptic, ma el vegn a votar gea e less persuader fin oz suentermezdi era sia fracziun. Ins crititgeschia gea ch'i dettia gia memia bleras cumissions da tuttas sorts, di il cusseglier da la pbd. I de-

pendia dentant adina da la cumposiziun e da las persunas che sesian en ina cumissiun. En sazez saja quai schon pli scort sch'ina persuna s'engaschia direct per ina chaussa che dad installar ina cumissiun. En lezzas vegnian ils problems magari be spustads ed il davos fatg pauc. Ma sche las dretgas persunas sesian en ina cumission portia quai avantatgs.

Sustegn da la pcd e da la ps

Cleramain sustegn survegna Engler da sia atgna fracziun. Tenor *Martin Candinas* ha la pcd decidì da votar gea. Era la ps s'exprimia a moda positiva, di *Silva Semadeni*. I dovria experts che valiteschian e tegnian en egl ils problems da linguas, sco per exempel la discussiun davart las lin-

guas estras en scola. Uschia pensa er ina ferma minoritad da la cumissiun predeliberanta. Il davos temp sajan las linguas minoritaras vegnidas sut squitsch ed ina cumissiun da linguas pudess – betg il davos era per la coesiun naziunala – sustegnair e cussegljar la regenza svizra en sia politica, communitgescha la cumissiun.

La maioritad è sceptica visavi la moziun e fa attent che la confederaziun sustegnja finanziaimain gia organizaziuns linguistics e chantuns plurilinges e promovia il rumantsch ed il talian en rama da la lescha da linguas. Ultra da quai fa la maioritad valair ch'il cussegl federal disponia gia oz dad avunda canals per consultar experts e ch'el coordineschia sia politica sche necessari cun ils tshertgels pertutgads.

Era per Jenics, Gualsers e Francoprovenzals

Concret propona Engler ina cumissiun paritetica che sa cumpona da mintgamai trais exponents da las quatter linguas naziunalas sco da trais ulteriurs represchentants da minoritads linguistics: dals Jenics, Gualsers u Francoprovenzals. La confederaziun haja la rolla da promover la coesiun ensemen cun ils chantuns, argumentescha Engler en la moziun. Ma per la politica da linguas stettian mo paucas resursas a disposiziun. Da rinforzar la politica da linguas federalas saja perquai giavischaivel, er areguard la discussiun da las linguas estras en scola. «Gist sin il champ da las linguas saja necessaria ina politica fundada che resguardia las atgnadads da las communitads linguistics, ils giavischs dals chantuns, ma era la perspectiva da l'entira Svizra en la convivenza da las linguas.»



Il cusseglier dals chantuns Stefan Engler (pcd GR) propona d'installar ina cumissiun da convivenza che duai s'occupar cun las linguas.

MAD